

四庫全書

集部

欽定四庫全書

集部

萬首唐人絕句卷一至三

詳校官庶吉士臣柳遵祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

集部八

萬首唐人絕句

總集類

提要

臣等謹案萬首唐人絕句一百卷宋洪邁
編邁有容齋隨筆已著錄邁於淳熙間錄
唐五七言絕句五千四百首進御後復補輯
得滿萬首為百卷紹熙三年上之是時降勅
褒嘉有選擇甚精備見博洽之論陳振孫書

錄解題謂其中多採宋人詩如李九齡郭震
滕白王禹王初之屬其尤不深考者為梁何
遜劉克莊後村詩話亦謂其但取唐人文集
雜說抄類成書非必有所去取蓋當時瑣屑
摭拾以足萬首之數其不能精審勢所必然
無怪後人之排詆至程秘洺水集責邁不應
以此書進御則與張栻詆呂祖謙不應編文
鑑同一偏見論雖正而實迂矣是書原本一

百卷每卷以百首為率今考書中有一卷而
百餘首者有一卷而不及百首者又七言原
缺第十八十九二十二十一二十二五言原
缺第十七二十三二十四二十五共九卷無
可校補今亦仍之焉乾隆四十六年十月恭
校上

總纂官臣紀昀臣陸錫熊臣孫士毅

總校官臣陸費墀

萬首唐人絕句詩序

淳熙庶子秋邁解建安郡印歸時年五十八矣身入老境眼意倦罷不復觀書惟時時教穉兒誦唐人絕句則取諸家遺集一切整彙凡五七言五千四百篇手書為六帙起家守婺齋以自隨踰年再還朝侍壽皇帝清燕偶及宮中書扇事聖語云此使人集錄唐詩得數百首邁因以昔所編具奏天旨驚其多且今以元本進入蒙寘諸復古殿書院又四年來守會稽間公事餘分又討

理向所未盡者唐去今四百歲考藝文志所載以集著錄者幾五百家今董及半而或失真如王涯在翰林同學士令狐楚張仲素所賦宮詞諸章乃誤入於王維集金華所刊杜牧之續別集皆許渾詩也李益返照入閭巷愁來與誰語一篇又以為耿漳崔魯白首成何事無歡可替愁一篇又以為張蠩以薛能邵平瓜地入吾廬一篇為曹鄴以狄歸昌馬嵬坡下柳依依一篇為羅隱如是者不可勝計今之所編固亦不能自免然不暇正

又取郭茂倩樂府與稗官小說所載仙鬼諸詩撮其可
讀者合為百卷刻板蓬萊閣中而識其本末於首紹熙
元年十一月戊午煥章閣學士宣奉大夫知紹興軍府
事兩浙東路安撫使魏郡公洪邁序

越府所刻七言至二十六卷五言至二十卷而奉
祠歸鄱陽惟書不可以不成乃雇婺匠續之于容
齋旬月而畢二年十一月戊辰邁題

重華宮投進劄子

臣以么麼餘生獲安故里竊恃隆遇冒昧有陳臣頃歲
備數禁廷得侍清閒之燕因及手寫唐人絕句詩即蒙
聖旨許令進入是時纔有五十四卷去年守越嘗于公
庫鏤板未及了畢奉祠西歸家居無事又復搜討文集
傍及傳記小說遂得滿萬首分為百卷輒以私錢雇工
接續雕刻今已成書謹裝褙一部遣人恭詣進司伺
候投進凡目錄一冊七言十五冊五言五冊共二十一

冊用匣盛貯伏望聖慈特賜宣取干犯宸嚴臣無任惶懼隕越昧死之至取進止

南內於清間之燕上添入至尊壽皇聖帝六字

貼黃上件詩集七言二十六卷以前五言

二十卷以前係紹興府所刻臣臨行時倉

卒印造紙剗多不精續後點檢得有錯誤

處只用雌黃塗改今來無由別行修換以

之進御實為不謹臣不勝戰懼俟罪之至

仰乞聖察

紹熙三年三月進蒙壽皇聖帝支賜下奏人錢三十貫文

重華宮宣賜白劉子

得壽皇聖帝聖旨宣諭閣學比觀向所進唐詩絕句選
擇甚精備見博洽令賜茶一百夸清馥香一十貼薰香
二十貼金器一百兩

二月 日 安仁 禮 回 汝弼恭承

左武大夫利州觀察使提舉佑神觀 重華宮同提點盧安仁

親衛大夫保信軍承宣使 重華宮提點闕 禮

中亮大夫安慶軍承宣使 重華宮提點吳 回

正侍大夫昭慶軍承宣使 重華宮提點霍汝弼

謝表

臣邁言伏蒙聖恩遣東義郎重華宮祇應耿柎以三月一日到饒州齋提舉官霍汝弼等白劄子得聖旨宣諭臣比觀向所進唐詩絕句選擇甚精備見博洽今賜茶一百夸清馥香一十貼薰香二十貼金器一百兩臣即時出城迎拜還家望闕謝恩祇受訖膚使馳輶蕃錫耀綸章之渥精鏐製器寶鄉兼貢茗之珍光塞門闌驪傾

里社臣邁中謝伏念臣愚無所用老自宜休與佛有緣
曾是靈山之下走事君盡禮積承溫室之隆知頃因心好
於唐文輒爾手編於詩律嘗蒙宣索每恨疎蕪比歲旁
搜遂及萬篇之富成書上奏幸塵乙夜之觀敢覲華褒
更加異寵得黃金百初微李布之名復白圭三不慮南
容之玷允謂非常之賜真為不朽之榮茲蓋恭遇至尊
壽皇聖帝陛下味道希夷儲神昭曠為天子父既超大
有之尊以聖人才尚錄小成之技生令鬼鎖沐此恩輝

臣拜舞以還怔營自失如雲如日應無就望之期若子
若孫唯誓縻捐之報

別奏劄子

臣逖遠威顏忽焉六載念以么麼之質被蒙眷知度越
輩流可為希世之遇鈞天夢斷無復可尋罷越還家杜
門屏迹自去春投進唐詩一伸奏牘之後不敢妄以孤
遠姓名復塵淵几誠不自意思從天來顓降使車盼之
珍賜玉音褒諭金寶爛然榮光非常道路駭矚益自鄙

陽有郡以來所未之見陛下脫屣北宮遺物離人而立
於獨予以馭幸寥寥弗聞臣獨何人邈在千里之外乃
拜殊渥焚香望闕盡室歡呼捧玩之餘感極以泣已具
表稱謝外復此手劄少攄螻螻之誠臣竊不自揆再有
昧死之請向者蒙賜野處二大字既已摹勒作碑揭于
小園往來觀瞻無不稽首今祇戴恩華巍巍卓異思欲
有以夸示無極輒摭聖諭中博洽兩字建為一堂妄意
長夏之始殿閣餘涼游戲翰墨之間敢乞憐臣區區之

愚貴以博洽堂三字受言藏之使子子孫孫朝暮瞻仰
臣年過七十無復他榮癡庸有求罪當萬死伏惟聖慈
曲垂寬貸引望黼宸無翼以翔不勝感恩戀德隕越激
切之至

奏耿柟不受書送劄子

臣茲勤使者遠至榮耀非常在于故事當有薄禮欲以
銀百兩充書送楮幣百千犒從人而耿柟再三退却以
為聖旨不許收接無以展區區下悃臣不勝惶懼感戴

之極須至奏聞者

謝南內奏狀

右臣伏蒙至尊壽皇聖帝聖恩特降專使秉義郎重華
宮祇應耿棣以三月一日至饒州齋霍汝弼等白劄子
傳聖旨宣諭以臣向所進唐詩絕句賜臣茶一百夸清
馥香一十貼薰香二十貼金器一百兩臣已即時出州
城迎拜還家望闕祇受訖上件異數出自聖恩臣無任
感天荷聖激切屏營之至謹錄奏謝以聞謹奏

紹熙四年三月 日煥章閣學士宣奉大夫提舉隆興府玉隆萬壽宮魏郡開國公食邑二千五百戶食實封二百戶臣洪邁狀奏

欽定四庫全書

萬首唐人絕句卷一

宋 洪邁 編

七言

贈李白

杜甫

秋來相顧尚飄蓬，未就丹砂愧葛洪。
痛飲狂歌空度日，飛揚跋扈為誰雄。

三絕句

卷一
楸樹馨香倚釣磯
斬新花藥未應飛
不如醉裏風吹盡
可忍醒時雨打稀

門外鷓鴣去不來
沙頭忽見眼相猜
自今已後知人意
一日須來一百回

無數春筍滿林生
柴門密掩斷人行
會須上番看成竹
客至從嗔不出迎

漫興九首

眼見客愁愁不醒
無賴春色到江亭
即遣花開深造次

便覺鶯語太丁寧

手種桃李非無主
野老牆低還是家
恰似春風相欺得
夜來吹折數枝花

熟知茅齋絕低小
江上鶯子故來頻
啣泥點污琴書內
更接飛蟲打著人

二月已破三月來
漸老逢春能幾回
莫思身外無窮事
且盡生前有限杯

腸斷春江欲盡頭
杖藜徐步立芳洲
顛狂柳絮隨風去

輕薄桃花逐水流

懶慢無堪不出村
呼兒日在掩柴門
蒼苔濁酒林中靜
碧水春風野外昏

糝徑楊花鋪白氍
點溪荷葉疊青錢
筍根稚子無人見
沙上鳬鵲傍母眠

舍西柔桑葉可拈
江畔細麥復纖纖
人生幾何春已夏
不放香醪如蜜甜

隔戶楊柳弱嫋嫋
恰似十五女兒腰
誰謂朝來不作意

狂風挽斷最長條

贈花卿

錦城絲管日紛紛
半入江風半入雲
此曲祇應天上有
人間能得幾回聞

少年行

馬上誰家白面郎
臨墻下馬坐人牀
不通姓字龐豪甚
指點銀瓶索酒嘗

覓挑裁

奉乞桃栽一百根
春前為送浣花村
河陽縣裏雖無數
濯錦江邊未滿園

覓綿竹

華軒藹藹他年到
綿竹亭亭出縣高
江上舍前無此物
幸分蒼翠拂波濤

覓檜木栽

草堂塹西無樹林
非子誰復見幽心
飽聞檜木三年大
與致溪邊十畝陰

覓松樹子

落落出羣非櫟柳青青不朽豈楊梅欲存老蓋千年意
為覓霜根數寸栽

覓果栽

草堂少花今欲栽不問綠李與黃梅石笋街中却歸去
果園坊裏為求來

贈鄭鍊赴襄陽

鄭子將行罷使臣囊無一物獻尊親江山路遠羈離日

表馬誰為感激人

江畔獨步尋花七絕句

江上被花惱不徹無處告訴只顛狂走覓南鄰愛酒伴

經旬出飲獨空牀

稠花亂蘂裹江濱行步歌危實怕春詩酒尚堪驅使在
未須料理白頭人

江深竹靜兩三家多事紅花映白花報荅春光知有處
應須美酒送生涯

東望少城花滿煙
百花高樓更可憐
誰能載酒開金盞
喚取佳人舞繡筵

黃師塔前江水東
春光懶困倚微風
桃花一簇開無主
可愛深紅映淺紅

黃四娘家花滿蹊
千朵萬朵壓枝低
留連戲蝶時時舞
自在嬌鶯恰恰啼

不是愛花即欲死
只恐花盡老相催
繁枝容易紛紛落
嫩蕊商量細細開

春水二絕

二月六夜春水生門前小灘渾欲平
鷓鴣鷓鴣莫漫喜
吾與汝曹俱眼明

一夜水高二尺強數日不可更禁當
南市津頭有船賣
無錢即買繫籬傍

官池春鴈二首

自古稻粱多不足至今鴻鴈亂為羣
且休悵望看春水
更恐歸飛隔暮雲

青春欲盡急還鄉紫塞寧論尚有霜翅在雲天終不遠
力微繒繳絕須防

中丞嚴公雨中垂寄見憶奉荅二絕

雨映行宮辱贈詩元戎肯赴野人期江邊老病雖無力
強擬晴天理釣絲

何日雨晴雲出溪白沙青石洗無泥只須伐竹開荒徑
拄杖穿花聽馬嘶

謝嚴中丞送青城山道士乳酒

山瓶乳酒下青雲
氣味濃香幸見分
鳴鞭走送憐漁父
洗盞開嘗對馬軍

得房公池鵝

房相西亭鵝一羣
眠沙泛浦白於雲
鳳凰池上應迴首
為報籠隨王右軍

戲作寄上漢中王二首

王新誕
明珠

雲裏不聞雙鴈過
掌中貪見一珠新
秋風嫋嫋吹江漢
只在他鄉何處人

謝安舟楫風還起梁苑池臺雪欲飛
杳杳東山攜漢妓
泠泠脩竹待王歸

投簡梓州幕府兼簡韋十郎官

幕下郎官安穩無從來不奉一行書
固知貧病人須棄
能使韋郎跡也踈

荅楊梓州

悶到房公池水頭坐逢楊子鎮東州
却向青溪不相見
回船應載阿戎游

惠義寺園送辛員外

朱櫻此日垂朱實郭外誰家負郭田
萬里相逢貪握手
高才仰望足離筵

乞大邑瓷盃

大邑燒瓷輕且堅扣如哀玉錦城傳
君家白盃勝霜雪
急送茅齋也可憐

奉和嚴鄭公軍城早秋

秋風嫋嫋動高旌玉帳分弓射敵營
已收滴博雲間戍

更奪蓬婆雪外城

絕句四首

堂西長笋別開門
塹北行椒却背村
梅熟許同朱老喫
松高擬對阮生論

欲作魚梁雲復湍
因驚四月雨聲寒
青溪先有蛟龍窟
竹石如山不敢安

兩箇黃鸝鳴翠柳
一行白鷺上青天
窻含西嶺千秋雪
門泊東吳萬里船

藥條藥甲潤青青色過棕亭入草亭
苗滿空山慙取譽
根居隙地怯成形

李司馬橋了承高使君自成都回

向來江上手紛紛三日功成事出羣
已傳童子騎青竹
總擬橋東待使君

漫成一絕

江月去人只數尺風燈照夜欲三更
沙頭宿鷺聯拳靜
船尾跳魚撥刺鳴

承聞河北諸道節度入朝歡喜口號絕句十二首

祿山作逆降天誅更有思明亦已無
洵人寰猶不定時時鬪戰欲何須

社稷蒼生計必安將軍跋扈錯相干
周宣漢武今王是孝子忠臣後代看

喧喧道路多譎謠河北將軍盡入朝
始是乾坤王室正却教江漢客魂銷

不道諸公無表來茫然庶事遣人猜擁兵相學干戈銳
使者徒勞百萬回

鳴玉鏘金盡正臣修文偃武不無人興王會靜妖氛氣
聖壽宜過一萬春

英雄見事若通神聖哲為心小一身燕趙休矜出佳麗
宮闈不擬選才人

抱病江天白首郎空山樓閣暮春光衣冠是日朝天子
草奏何時入帝鄉

澶漫山東一百州削成如按抱青丘苞茅重入歸關內
王祭還供盡海頭

東逾遼水北滹沱星象風雲喜共和紫氣關臨天地闊
黃金臺貯俊賢多

漁陽突騎邯鄲兒酒酣並轡金鞭垂意氣即歸雙闕舞
雄豪復遣五陵知

李相將軍擁薊門白頭雖老赤心存竟能盡說諸侯入
知有從來天子尊

十二年來多戰場天威已息陣堂堂神靈漢代中興主
功業汾陽異姓王

喜聞盜賊蕃寇總退口號五首

蕭關隴水入官軍青海黃河卷塞雲北極轉愁龍虎氣
西戎休縱敵仇羣

贊普多教使入秦數通和好止煙塵朝廷忽用哥舒將
殺伐虛悲公主親

崆峒西極過崑崙駝馬由來擁國門逆氣數年吹路斷

蕃人聞道漸星奔

勃律天西采玉河堅昆碧益最來多舊隨漢使千堆寶
少荅胡王萬匹羅

今春喜氣滿乾坤南北東西拱至尊大厯三年調玉燭
玄元皇帝聖雲孫

存歿口號二首

席謙不見近彈碁畢耀仍傳舊小詩玉局他年無限笑

白楊今日幾人悲

道士席謙善彈碁故曰玉局

鄭公粉繪隨長夜曹霸丹青已白頭天下何曾有山水

人間不解重驂韶

高士榮陽鄭虔善畫山水曹善畫馬也

上卿翁請修武侯廟遺像缺落時崔卿權夔州

大賢為政即多聞刺史真符不必分尚有西郊諸葛廟

臥龍無首對江濱

解悶十二首

草閣柴扉星散居浪翻江黑雨飛初山禽引子哺紅果

溪女得錢留白魚

商胡離別下揚州憶上西陵故驛樓為問淮南米貴賤
老夫乘興欲東流

一辭故國十經秋每見秋瓜憶故丘今日南湖采薇蕨
何人為覓鄭瓜州

沈范早知何水部曹劉不待薛郎中獨當省署開文苑
兼泛滄浪學釣翁

李陵蘇武是吾師孟子論文更不疑一飯未曾留俗客
數篇今見古人詩

復憶襄陽孟浩然清詩句句盡堪傳即今者舊無新語
漫釣槎頭縮項鱖

陶冶性靈存底物新詩改罷自長吟孰知二謝將能事
頗學陰何苦用心

不見高人王右丞藍田丘壑漫寒藤最傳秀句寰區滿
未絕風流相國能

先帝貴妃今寂寞荔枝還復入長安炎方每續朱櫻獻
玉座應悲白露團

憶過瀘戎摘荔枝青楓隱映石逶迤京中舊見君顏色
紅顆酸甜只自知

翠爪碧李沉玉甃赤梨蒲萄寒露成可憐先不異枝蔓
此物娟娟長遠生

側生野岸及江蒲不熟丹宮滿玉壺雲壑布衣鮐背死
勞生重馬翠眉須

夔州歌十絕句

中巴之東巴東山江水開闢流其間白帝高為三峽鎮

夔州險過百牢關

白帝夔州各異城
蜀江楚峽混殊名
英雄割據非天意
霸主并吞在物情

羣雄競起問前朝
王者無外見今朝
叱訝漁陽結怨恨
元聽舜日舊蕭韶

赤甲白鹽俱刺天
閭閻繚繞接山巔
楓林橘樹丹青合
複道重樓錦綉懸

灩東灩西一萬家
江北江南春冬花
背飛鶴子遺瓊葉

相趣鳬鷁入蔣牙

東屯稻畦一百頃北有澗水通青苗晴浴狎鷗分處處
雨隨神女下朝朝

蜀麻吳鹽自古通萬斛之舟行若風長年三老長哥裏
白晝攤錢高浪中

憶昔咸陽都市合山水之圖張賣時巫峽曾經寶屏見
楚宮猶對碧峰疑

武侯祠堂不可忘中有松柏叅天長干戈滿地客愁破

雲日如火炎天涼

閩風玄圃與蓬壺中有高堂天下無借問夔州壓何處
峽門江腹擁城隅

書堂飲既夜復邀李尚書下馬月下賦絕句

湖水臨風相與清殘罇下馬復同傾久拚野鶴如霜鬢
遮莫鄰雞下五更

戲為六絕句

庾信文章老更成凌雲健筆意縱橫令人嗤點流傳賦

不覺前賢畏後生

王楊盧駱當時體輕薄為文哂未休爾曹身與名俱滅
不廢江河萬古流

縱使盧王操翰墨劣於漢魏近風騷龍文虎脊皆君馭
歷塊過都見爾曹

才力應難跨數公凡今誰是出羣雄或看翡翠蘭若上
未掣鯨魚碧海中

不薄今人愛古人清詞麗句必為隣竊攀屈宋宜方駕

金
卷一
恐與齊梁作後塵

未及前賢更勿疑
遞相祖述復先誰
別裁偽體親風雅
轉益多師是汝師

少年行二首

莫笑田家老瓦盆
自從盛酒長兒孫
傾銀注瓦驚人眼
共醉終同卧竹根

巢燕養雛渾去盡
江花結子已無多
黃衫年少來宜數
不見堂前東逝波

萬首唐人絕句卷一

欽定四庫全書

萬首唐人絕句卷二

宋 洪邁 編

七言

結襪子

李白

燕南壯士吳門豪
筑中置鉛魚
隱刀感君恩
重許君命
太山一擲輕鴻毛

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

送賀賓客歸越

鏡湖流水漾清波
狂客歸舟逸興多
山陰道士如相見
應寫黃庭換白鵝

送韓侍御之廣德令

昔日繡衣何足榮
今宵貫酒與君傾
暫就東山賒月色
酣歌一夜送泉明

送外甥鄭灌從軍三首

六博爭雄好彩來，金盤一擲萬人開。
大夫賭命報天子，當斬仇讎衣錦回。

丈八蛇矛出隴西，彎弧拂箭白猿啼。
運籌必用龍韜策，積甲應將熊耳齊。

月蝕西方破敵時，及瓜歸日未應遲。
麾旄血變黃河水，梟首當懸白鵲旗。

長門怨

桂殿長愁不記春
黃金四屋起秋塵
夜懸明鏡青天上
獨照長門宮裏人

酬崔侍御

嚴陵不從萬乘遊
歸卧空山釣碧流
自是客星辭帝坐
元非太白醉揚州

崔詩云天外常求太白
老金陵捉得酒仙人

送孟君之廣陵

故人西辭黃鶴樓
煙花三月下揚州
孤帆遠影碧山盡
唯見長江天際流

春夜洛城聞笛

誰家玉笛暗飛聲，散入春風滿洛城。
此夜曲中聞折柳，何人不起故園情。

峨眉山月歌

峨眉山月半輪秋，影入平羌江水流。
夜發青溪向三峽，思君不見下渝州。

永王東巡歌十一首

永王正月東出師，天子遙分龍虎旗。
樓船一舉風波靜，

江漢翻為鴈鷺池

三川北寇亂如麻四海南奔似永嘉但用東山謝安石
為君談笑靜胡沙

雷鼓嘈嘈喧武昌雲旗獵獵過潯陽秋毫不犯三吳悅
春日遙看五色光

龍盤虎踞帝王州帝子金陵訪古丘春風試暖昭陽殿
明月還過鳩鵲樓

二帝巡遊俱未回五陵松柏使人哀諸侯不救河南地

更喜賢王遠道來

丹陽北固是吳關
畫出樓臺雲水間
千巖烽火連滄海
南望旌旗繞碧山

王出三江按五湖
樓船跨海次揚都
戰艦森森羅虎士
征帆一一引龍駒

長風挂席勢難回
海動山傾古月摧
君看帝子浮江日
何似龍驤出峽來

祖龍浮海不成橋
漢武潯陽空射蛟
我王樓艦輕秦漢

却似文皇欲渡遼

帝寵賢王入楚關掃清江漢始應還初從雲夢開朱邸
更取金陵作小山

試借君王玉馬鞭指麾戎寇坐瓊筵南風一掃邊塵靜
西入長安到日邊

橫江詞五首

海潮南去過潯陽牛渚由來險馬當橫江欲渡風波惡
一水牽愁萬里長

橫江西望阻西秦
漢水東連揚子津
白浪如山那可渡
狂風愁殺峭帆人

海神東過惡風回
浪打天門石壁開
浙江八月何如此
濤似連山噴雪來

橫江館前津吏迎
向余東指海雲生
郎今欲渡緣何事
如此風波不可行

月暈天風霧不開
海鯨東蹙百川回
驚波一起三山動
公無渡河歸去來

上皇西巡南京歌十首

邊塵輕拂建章臺
聖主西巡蜀道來
劍壁門高五千尺
石為樓閣九天開

九天開出一成都
萬戶千門入畫圖
草樹雲山如錦繡
秦川得及此間無

德陽春樹似新豐
行入新都若舊宮
柳色未饒秦地綠
花光不減上林紅

誰道君王行路難
六龍西幸萬人歡
地轉錦江成渭水

天回玉壘作長安

萬國同風共一時錦江何謝曲江池石鏡更明天上月
後宮親得照蛾眉

濯錦清江萬里流雲帆龍舸下揚州北地雖誇上林苑
南京還有散花樓

錦水東流繞錦城星橋北挂象天星四海此中朝聖主
峨眉山上列仙庭

秦開蜀道置金牛漢水元通星漢流天子一行遺聖跡

錦城長作帝王州

水綠天青不起塵
風光和暖勝三秦
萬國煙花隨玉輦
西來添作錦江春

劍閣重關蜀北門
上皇歸馬若雲屯
少帝長安開紫極
雙懸日月照乾坤

與史郎中飲聽黃鶴樓上吹笛

一為遷客去長沙
西望長安不見家
黃鶴樓中吹玉笛
江城五月落梅花

望廬山瀑布水

日照香爐生紫煙遙看瀑布挂長川
飛流直下三千尺疑是銀河落九天

白帝下江陵

朝辭白帝彩雲間千里江陵一日還
兩岸猿聲啼不盡須臾過却萬重山

巫山枕障

巫山枕障盡高丘白帝城邊樹色秋
朝雲夜入無行處

卷二
已水橫天更不流

吳王舞人半醉

風動荷花水殿香
姑蘇臺上宴吳王
西施醉舞嬌無力
笑倚東窗白玉牀

望廬山五老峰

廬山東南五老峰
青天削出金芙蓉
九江秀色可攬結
吾將此地巢雲松

宣城見杜鵑花

蜀國曾聞子規鳥宣城還見杜鵑花一叫一回腸一斷
三春三月憶三巴

哭晁卿

日本晁卿辭帝都征帆一片遠蓬壺明月不歸沈碧海
白雲愁色滿蒼梧

秋下荊門

霜落荊門秋樹空布帆無恙挂秋風此行不為鱸魚膾
自愛名山入剡中

魯東門泛舟二首

日落沙門天倒開，波搖石動水縈回。
輕舟泛月尋溪轉，疑是山陰雪後來。

水作青龍盤石堤，桃花夾岸魯門西。
若教月下乘舟去，何啻風流到剡溪。

廬江主人婦

孔雀東飛何處栖，廬江小吏仲卿妻。
為客裁縫君自見，城烏獨宿夜空啼。

陪族叔刑部侍郎曄及中書賈舍人至遊洞庭五首
洞庭西望楚江分水盡南天不見雲日落長沙秋色遠
不知何處弔湘君

南湖秋水夜無煙耐可乘流直上天且就洞庭賒月色
將船買酒白雲邊

洛陽才子謫湘川元禮同舟月下仙記得長安還欲笑
不知何處是西天

洞庭湖西秋月輝瀟湘江北早鴻飛醉客滿船歌白紵

不知霜露入秋衣

帝子瀟湘去不還
空餘秋草洞庭間
淡掃明湖開玉鏡
丹青畫出是君山

望天門山

天門中斷楚江開
碧水東流直北回
兩岸青山相對出
孤帆一片日邊來

與謝良輔遊涇川陵巖寺

乘君素舸泛涇西
宛似雲門對若溪
且從康樂尋山水

何必東流入會稽

山中問荅

問余何意棲碧山笑而不荅心自閒
桃花流水窅然去
別有天地非人間

魯國見狄博通

去年別我向何處有人傳道遊江東
謂言挂席渡滄海
却來應是無長風

山中與幽人對酌

兩人對酌山花開一盃一盃復一盃我醉欲眠卿且去
明朝有意抱琴來

長門怨

天回北斗挂西樓金屋無人螢火流月光欲到長門殿
別作深宮一段愁

春怨情

白馬金羈遼海東羅帷繡被卧春風落月低軒窺燭盡
飛花入戶笑牀空

南流夜郎寄內

夜郎天外怨離居
明月樓中音信疎
北鴈春歸看欲盡
南來不得豫章書

陌上贈美人

駿馬驕行踏落花
垂鞭直拂五雲車
美人一笑寒珠箔
遙指紅樓是妾家

別內三首

王命三徵去未還
明朝離別出吳關
白玉高樓看不見

相思須上望夫山

出門妻子強牽衣
問我西行幾日歸
來時儻佩黃金印
莫見蘇秦不下機

翡翠為樓金作梯
誰人獨宿倚門啼
夜坐寒燈連曉月
行行淚盡楚關西

雨中贈仙人山賈山人

柳宗元

寒江夜雨聲潺潺
曉雲遮盡仙人山
遙知玄豹在深處
下笑羈絆泥塗間

夏晝偶作

南州溽暑醉如酒，隱几熟眠開北牖。
日午獨覺無餘聲，山童隔竹敲茶臼。

雨晴後至江渡

江雨初晴思遠步，日西獨向愚溪渡。
渡頭水落村迳成，撩亂浮槎在高樹。

與初上人

海畔尖山似劍鋸，秋來處處割愁腸。
若為化得身千億，

散上峰頭望故鄉

詔追赴都

每憶纖鱗遊尺澤
翻愁弱羽上丹霄
岸旁古堠應無數
次第行看別路遥

過衡山

故國名園久別離
今朝楚樹發南枝
晴天歸路好相逐
正是峰前回鴈時

汨羅

南來不作楚臣悲，重入修門自有期。
為報春風汨羅道，莫將波浪枉明時。

離觴不醉至驛却寄相送諸公

無限居人送獨醒，可憐寂寞到長亭。
荆州不遇高陽侶，一夜春寒滿下廳。

清水驛

簷下踈篁十二莖，襄陽從事寄幽情。
祇應更使伶倫見，寫盡雌雄雙鳳鳴。

詔追赴都

十一年前南渡客四千里外北歸人
詔書許逐陽和至
驛路開花處處新

李西川

遠師騶忌鼓鳴琴去和南風愜舜心
從此他山千古重
殷勤曾是奉徽音

奉酬楊侍郎

貞一來時送綵牋一行歸鴈慰驚弦
翰林寂寞誰為主

鳴鳳應須早上天

柳州二月

宦情羈思共悽悽
春半如秋意轉迷
山城過雨百花盡
榕葉滿庭鶯亂啼

初上人

珠樹玲瓏隔翠微
病來方外事多違
仙山不屬分符客
一任凌空錫杖飛

殷賢戲批書後寄劉連州并示孟崙二童

書成欲寄庾安西
紙背應勞手自題
聞道近來諸子弟
臨池尋已厭家雞

銅魚使

行盡關山萬里餘
到時間井是荒墟
附庸唯有銅魚使
此後無因寄遠書

韓漳州書報徹上人亡二絕

早歲經華聽越吟
聞君江海分逾深
他時若寫蘭亭會
莫畫高僧支遁林

頻把瓊書出袖中獨吟遺句立秋風桂江日夜流千里
揮淚何時到甬東

酬夢得

日日臨池弄小鷗還思寫論付官奴柳家新樣元和脚
且盡薑芽斂手徒

重贈二首

聞說將雛向墨池劉家還有異同詞如今試遣隈牆問
已道世人那得知

世上悠悠不識真蘊芽盡是捧心人若道柳家無子弟
往年何事乞西賓

疊前

小學新翻墨沼波羨君瓊樹散枝柯在家弄玉唯嬌女
空覺庭前鳥跡多

疊後

事業無成恥藝成南宮起草舊連名勸君火急添功用
趣取當時二妙聲

聞徹上人亡寄楊侍郎

東越高僧還姓湯
幾時瓊珮觸鳴璫
空花一散不知處
誰采金英與侍郎

段九秀才處見呂衡州書迹

交侶平生意最親
衡陽往事似分身
袖中忽見三行字
拭淚相看是故人

重別

二十年來萬事同
今朝歧路忽西東
皇恩若許歸田去

晚歲當為鄰舍翁

荅夢得

弱冠同懷長者憂臨歧回想盡悠悠
耦耕若便遺身世黃髮相看萬事休

種木槲花

上苑年年占物華飄零今日在天涯
只應長作龍城守剝種庭前木槲花

摘櫻桃

海上朱櫻贈所思
樓居況是望仙時
蓬萊羽客如相訪
不是偷桃一小兒

酬曹侍御

破額山前碧玉流
騷人遥駐木蘭舟
春風無限瀟湘意
欲採蘋花不自由

始見白髮題所種石榴

幾年封植愛芳叢
韶艷朱顏競不同
從此休論上春事
看成古木對衰翁

聞籍田

天田不日降皇輿留滯長沙歲又除宣室無由問鰲事
周南何處託成書

柳州寄京中親故

林邑山聯瘴海秋牂牁水向郡前流勞君遠問龍城地
正北三千到錦州

萬首唐人絕句卷二

欽定四庫全書

萬首唐人絕句卷三

宋 洪邁 編

七言

龍移

韓愈

天昏地黑蛟龍移
雷驚電激雌雄隨
清泉百丈化為土
魚鼈枯死吁可悲

題楚昭王廟

丘園滿目衣冠盡城闕連雲草樹荒猶有國人懷舊德
一間茅屋祭昭王

湘中酬張十一功曹

休垂絕徼千行淚共泛清湘一葉舟今日嶺猿兼越鳥
可憐同聽不知愁

郴口又贈二首

山作劍攢江寫鏡扁舟斗轉疾於飛回頭笑向張公子
終日思歸此日歸

雲飈霜翻看不分雷驚電激語難聞沿崖宛轉到深處
何限青天無片雲

題木居士二首

火透波穿不計春根如頭面榦如身偶然題作木居士
便有無窮求福人

為神詎比溝中斷遇賞還同燮下餘朽蠹不勝刀鋸力
匠人雖巧欲何如

湘中

猿愁魚踊水翻波自古流傳是汨羅蘋藻滿盤無處奠
空聞漁父叩舷歌

別盈上人

山僧愛山出無期俗士牽俗來何時祝融峰下一回首
即是此生長別離

聞梨花發贈劉師命

桃蹊惆悵不能過紅艷紛紛落地多聞道郭西千樹雪
欲將君去醉如何

梨花下贈劉師命

洛陽城外清明節
百花寥落梨花發
今日相逢瘴海頭
共驚爛漫開正月

和歸工部送僧約

早知皆是自拘囚
不學因循到白頭
汝既出家還擾擾
何人更得死前休

入關詠馬

歲老豈能充上駟
力微當自謹前程
不知何故翻驤首

牽過關門妄一鳴

榴花

五月榴花照眼明
枝間時見子初成
可憐此地無車馬
顛倒青苔落絳英

井

賈誼宅中今始見
葛洪山下昔曾窺
寒泉百尺空看影
正是行人暍死時

蒲萄

新莖未徧半猶枯
高架支離倒復扶
若欲滿盤堆馬乳
莫辭添竹引龍鬚

峽石西泉

居然鱗介不能容
石眼環環水一鍾
聞說旱時求得雨
祇疑科斗是蛟龍

酬王二十舍人雪中見寄

三日柴門擁不開
堦庭平滿白皚皚
今朝蹋作瓊瑤跡
為有詩仙鳳沼來

送侯喜

已作龍鍾後時者懶於街裏蹋塵埃如今便別長官去
直到新年衙日來

題百葉桃花

百葉雙桃晚更紅臨窻映竹見玲瓏應知侍史歸天上
故伴仙郎宿禁中

春雪

新年都未有芳華二月初驚見草芽白雪却嫌春色晚

故穿庭樹作飛花

盆池五首

老翁真箇似童兒
汲井埋盆作小池
一夜青蛙鳴到曉
恰如方口釣魚時

莫道盆池作不成
藕梢初種已齊生
從今有雨君須記
來聽蕭蕭打葉聲

瓦沼晨朝水自清
小蟲無數不知名
忽然分散無蹤影
唯有魚兒作隊行

泥盆淺小詎成池夜半青蛙聖得知一聽暗來將伴侶
不煩鳴喚闕雄雌

池光天影共青青拍岸纔添水數鉞且待夜深明月去
試看涵泳幾多星

芍藥

浩態狂香昔未逢紅燈爍爍綠盤龍覺來獨對忽驚恐
身在仙宮第幾重

賽神

白布長衫紫領巾
差科未動是閒人
麥苗含穗桑生
共向田頭樂社神

題于賓客莊

榆莢車前蓋地皮
薔薇蘸水筍穿籬
馬蹄無入朱門跡
縱使春歸可得知

晚春

草樹知春不久歸
百般紅紫闌芳菲
楊花榆莢無才思
惟解漫天作雪飛

落花

已分將身著地飛
那羞踐蹋損光暉
無端又被春風誤
吹落西家不得歸

楸樹三首

幾歲生成為大樹
一朝纏繞困長藤
誰人與脫青羅帔
看吐高花萬萬層

幸自枝條能樹立
何煩蘿蔓作交加
傍人不解尋根本
却道新花勝舊花

青幢紫蓋立童童
細雨浮煙作綵籠
不得畫師來貌取
定知難見一生中

風折花枝

浮艷侵天難就看
清香撲地可遙聞
春風也是多情思
故揀繁枝折贈君

贈張十八助教

喜君眸子重清朗
攜手城南歷舊遊
忽見孟生題竹處
相看淚落不能收

晚雨

廉纖晚雨不能晴
池岸草間蚯蚓鳴
投竿跨馬蹋歸路
纔到城門打鼓聲

出城

暫出城門蹋青草
遠於林下見春山
應須韋杜家家到
祇有今朝一日閒

遣興

斷送一生惟有酒
尋思百計不如閒
莫憂世事兼身事

須著人間比夢間

和武相公早春聞鶯

早晚飛來入錦城
誰人教解百般鳴
春風紅樹驚眠處
似妬歌童作艷聲

大安池

公主當年欲占春
故將臺榭壓城闌
欲知前面花多處
直到南山不屬人

晚春

誰收春色歸將去慢綠天紅半不存榆莢祇能隨柳絮
等閒撩亂走空園

過鴻溝

龍疲虎困割川原億萬蒼生性命存誰勸君王回馬首
真成一擲賭乾坤

送張侍郎

司徒東鎮馳書謁丞相西來走馬迎兩府元臣今轉密
一方逋寇不難平

贈刑部馬侍郎

紅旗照海壓南荒
徵入臺中作侍郎
暫從相公平小寇
便歸天闕致時康

和裴相公東征塗經女几山下作

旗穿曉日雲霞雜
山倚秋空劍戟明
敢請相公平賊後
暫攜諸吏上崢嶸

鄆城晚飲贈副使馬侍郎及馮宿李宗閔二員外

城上赤雲呈勝氣
眉間黃色見歸期
幕中無事惟須飲
即是連鑣向闕時

別留後侍郎

為文無出相如右
謀帥難居郤縠先
歸去雪消溱洧動
西來旌旆拂晴天

同李二十八員外從裴相公野宿西界

四面星辰著地明
散燒煙火宿天兵
不關破賊須歸奏
自趣新年賀太平

過襄城

郾城辭罷過襄城
潁水嵩山刮眼明
已去蔡州三百里
家人不用遠來迎

宿神龜招李二十八馮十七

荒山野水照斜暉
啄雪寒鷗趁影飛
夜宿驛亭愁不睡
幸來相就蓋征衣

和李二十八司勳連昌宮

夾道疎槐出老根
高甍巨棟壓山原
宮前遺老來相問

今是開元幾葉孫

次潼關先寄張十二閣老使君

荆山已去華山來日出潼關四扇開
刺史莫辭迎候遠相公親破蔡州回

次潼關上都統相公

暫辭堂印執兵權盡管諸軍破賊年
冠蓋相望催入相待將功德格皇天

桃林夜賀晉公

西來騎火照山紅
夜宿桃林臘月中
手把命珪兼相印
一時重疊賞元功

元日酬蔡州馬十二尚書去年蔡州元日見寄
之什

元日新詩已去年
蔡州遙寄荷相憐
今朝縱有誰人領
自是三冬不敢眠

答道士寄樹雞

軟濕青黃狀可猜
欲烹還喚木盤回
煩君自入華陽洞

直割乖龍左耳來

武關西逢配流吐蕃

嗟爾戎人莫慘然
湖南近地保生全
我今罪重無歸望
直去長安路八千

題臨瀧寺

不覺離家已五千
仍將衰病入瀧船
潮陽未到人先說
海氣昏昏水拍天

晚次宣溪韶州張使君惠書叙別酬以二章

韶州南去接宣溪雲水蒼茫日向西客淚數行元自落
鷓鴣休傍耳邊啼

兼金安足比清文白首相隨愧使君俱是嶺南巡管內
莫欺荒僻斷知聞

題秀禪師房

橋夾水松行百步竹牀莞席到僧家暫拳一手支頭卧
還把漁竿下釣沙

將至韶州先寄張使君借圖經

曲江山水聞來久恐不知名訪倍難願借圖經將入界
每逢佳處便開看

過始興江口感懷

憶作兒童隨伯氏南來今祇一身存目前百口還相逐
舊事無人可共論

題西林寺故蕭二郎中舊堂公有女為尼在汝
州

中郎有女能傳業伯道無兒可保家偶到廬山曾住處

幾行衰淚落煙霞

題廣昌館

白水龍飛已幾春
偶尋遺跡問耕人
丘墳發掘當官道
何處南陽有近親

寄周隨州員外

陸孟丘揚久作塵
同時存者更誰人
金丹別後知傳得
乞取刀圭救病身

早春與張博士籍遊楊尚書林亭寄第三閣老

兼呈白馮二閣老

牆下春渠入禁溝，渠冰初破滿渠浮。
鳳池近日長先暖，流到池時更不流。

壽陽驛

風光欲動別長安，春半邊城特地寒。
不見園花兼荅柳，馬頭惟有月團團。

鎮州初歸

別來楊柳街頭樹，擺撼春風祇欲飛。
還有小園桃李在，

留花不發待郎歸

同張水部籍遊曲江寄白二十二舍人

漠漠輕陰晚自開
青春白日映樓臺
曲江水滿花千樹
有底忙時不肯來

早春呈水部張十八員外二首

天街小雨潤如酥
草色遙看近却無
最是今年春好處
絕勝煙柳滿皇都

莫道官忙身老大
即無年少逐春心
馮君先到江頭看

柳色如今深未深

奉使鎮州行次承天行營奉酬裴司空相公
竄逐三年海上歸逢公復此著征衣旋吟佳句還鞭馬
恨不身先去鳥飛

鎮州路上謹酬裴司空相公重見寄

銜命山東撫亂師日馳三百自嫌遲風霜滿面無人識
何處如今更有詩

和李相公題蕭家林亭

山公自是林園主，歎惜前賢造作時。
巖洞幽深門盡鎖，不因丞相幾人知。

荅嚴大夫

賈至

今夕秦天一鴈來，梧桐墜葉擣衣催。
思君獨步華庭月，舊館秋陰生綠苔。

贈陝掾梁宏

梁子工文四十年，詩顛名過草書顛。
白頭仍作功曹掾，祿薄誰供沽酒錢。

西亭春望

日長風暖柳青青北鴈歸飛入宵冥
岳陽城上聞吹笛能使春心滿洞庭

送南給事貶崖州

疇昔丹墀與鳳池即今相見兩相悲
朱崖雲夢三千里欲別俱為慟哭時

重別南給事

謫宦三年尚未回故人今日又重來
聞道崖州一萬里

今朝須盡數千盃

別裴九弟

西江萬里向東流
今夜江邊駐客舟
月色更添春色好
蘆風似勝竹風幽

送王道士還京

一片仙雲入帝鄉
數聲秋鴈至衡陽
借問清都舊花月
豈知遷客泣瀟湘

巴陵夜別王八員外

柳絮飛時別洛陽
梅花發後在三湘
世情已逐浮雲散
離恨空隨江水長

岳陽樓重宴別王八員外貶長沙

江路東連千里潮
青雲北望紫微遙
莫道巴陵湖水闊
長沙南畔更蕭條

江南送李卿

雙鶴南飛度楚山
楚南相見憶秦關
願值回風吹羽翼
早隨陽鴈及春還

洞庭送李十二赴零陵

今日相逢落葉前
洞庭秋水遠連天
共說京華舊遊處
回看北斗欲潛然

送李侍郎赴常州

雪晴雲散北風寒
楚水吳山道路難
今日送君須盡醉
明朝相憶路漫漫

出塞曲

萬里平沙一聚塵
南飛羽檄北來人
傳道五原烽火急

單于昨夜扣新秦

春思二首

草色青青柳色黃
桃花歷亂李花香
東風不為吹愁去
春日偏能惹恨長

紅粉當爐弱柳垂
金花臘酒解酴醾
笙歌日莫能留客
醉殺長安輕薄兒

勤政樓觀樂

銀河帝女下三清
紫禁笙歌出九城
為報延州來聽樂

須知天下欲昇平

初至巴陵與李十二裴九同泛洞庭三首

上江相逢皆舊遊
湘山永望不堪愁
明月秋風洞庭水
孤鴻落葉一扁舟

江畔楓葉初帶霜
渚邊菊花亦已黃
輕舟落日興不盡
三湘五湖意何長

楓岸紛紛落葉多
洞庭秋水晚來波
乘興輕舟無近遠
白雲明月弔湘娥

歎乃曲

元結

獨存名跡在人間
順俗與時未安閒
來謁大官兼問政
扁舟却入九疑山


湘江二月春水平
滿月和風宜夜行
唱橈欲過平陽戍
守吏相呼問姓名

千里楓林煙雨深
無朝無暮有猿吟
停橈靜聽曲中意
好是雲山韶濩音

零陵郡北湘水東
浯溪形勝滿湘中
溪口石顛堪自逸

誰能相伴作漁翁

下瀧船似入深淵上瀧船似欲昇天
瀧南始到九疑郡應絕高人乘興船



萬首唐人絕句卷三